

1

SANDIGAN NGA PROLETARYO NGA PANINDUGAN KAG PANAN-AWAN SA REBOLUSYON

PANGBUKAS

Agud malig-on nga masulong ang rebolusyon tubtob sa kadalag-an, kinahanglan ang isa ka proletaryo nga partido nga ginaarmasan sang rebolusyonaryo nga teorya sang Marxismo-Leninismo-Kaisipang Mao Zedong, madalum nga nakaugat sa masa kag nakaugalian ang pagsaway-sa-kaugalingon. Ang partido nga ini ang taliba sang sahi nga mamumugon kag nagatiglawas sang konsentrado nga kusog sang sahi sa ideolohiya, pulitika kag organisasyon.

Agud mangin nagakadapat sa ila rebolusyonaryo nga katungdanan, ang mga katapu sang Partido dapat bug-uson sang mga pinakatampad kag pinakamalig-on nga elemento nga

natilawan sa rebolusyonaryo nga pagpakigbanggi sa mga sahi nga manugpigos kag manughimulos. Tagsa ka katapu sang Partido kinahanglan nga magpauswag sang iya nga proletaryo nga rebolusyonaryo nga kamuklatan kag magbag-o sang kaugalingon santo sa mga basehan nga proletaryo nga rebolusyonaryo nga panindugan kag panan-awan.

Ginasulong sang Partido subong ang ikaduha nga dungganon nga kahublagan sa pagpanadlong. Sa esensya, ini kahublagan nga pang-ideolohiya agud kakason ang mga malala nga paglihis kag pagsayup sa nagligad kag labi pa nga pauswagon ang ikasarang sang Partido kag rebolusyonaryo nga kahublagan sa pagpakig-away. Isa ka pangunahon nga bahin sang kahublagan nga ini ang pagpanibag-o nga kapagsik sa pagtuon kag pagtuman sa mga basehan nga proletaryo nga aktitud kag panan-awan.

Ang subong nga pagtuon sa mga basehan nga proletaryo nga panindugan kag panan-awan sa rebolusyon nagatuyo nga:

- * Pabakuron ang pang-ideolohiya nga kahandaan sang mga katapu sang Partido sa pagtuon sa Marxismo-Leninismo-Kaisipang Mao Zedong kag pagtuman sa mga rebolusyonaryo nga katungdanan;
- * Ipahakos ang matuod-tuod nga kahulugan sang pag-alagad sa

pumuluyo;

- * Ipahakos ang kahulugan kag kamalahalon sang pagtukod sang rebolusyonaryo nga paghiliusa sang pumuluyo kag mga katapu sang Partido;
- * Ipahakos ang kinahanglanon sang pagbag-o sang kaugalingon santo sa proletaryo nga panan-awan sa kalibutan paagi sa tampad nga pagsaway-sa-kaugalingon kag aktibo nga pagpakigbanggi sa ideolohiya; kag
- * Ipahakos ang proletaryo nga internasyunalismo kag mga pamaagi sang pagpatuman diri.

Ang pagtuon igatumod sa masunod nga lima ka halambalanon:

- 1) Pagsakdag sa Marxismo-Leninismo-Kaisipang Mao Zedong kag pagpakig-away sa rebisyunismo,
- 2) Lubos kag bug-os nga pag-alagad sa pumuluyo bilang kabug-usan sang panan-awan sa kalibutan sang Komunista,
- 3) Pagpakighiliusa sa malapad

nga mayorya sang pumuluyo
kag mga kaupod,

- 4) Pagsaway-sa-kaugalingon kag aktibo nga pagpakigbanggi sa ideolohiya, kag
- 5) Proletaryo nga internasyunalismo.

**A. DAPAT HUSTO NGA TUN-AN
KAG ISAPRAKTIKA SANG
KOMUNISTA ANG MARXISMO-
LENINISMO-KAISIPANG MAO
ZEDONG, KAG MALIG-ON NGA
PAMATUKAN ANG
REBISYUNISMO.**

1. **Nгаа basehan nga katungdanan
sang Komunista ang pagtuon sa
Marxismo-Leninismo-Kaisipang Mao
Zedong?**

Pinakamataas nga katungdanan sang Partido Komunista sang Pilipinas ang pagdapat sang unibersal nga kamatuoran sang Marxismo-Leninismo-Kaisipang Mao Zedong (MLKMZ) sa kongkreto nga praktika sang rebolusyong Pilipino.

Solo lamang sa basehan sang MLKMZ, ang

rebolusyonaryo nga teorya sang proletaryado sa panahon sang imperyalismo kag proletaryo nga rebolusyon, mahimo masulong kag mapadaog ang rebolusyon. Ang duha ka-hut-ong nga rebolusyong Pilipino, ang demokratiko nga rebolusyon sang banwa sa pagpamuno sang proletaryado, ang bunga sang pagdapat sang unibersal nga kamatuoran sang MLKMZ sa kongkreto nga praktika sang rebolusyong Pilipino.

Ang MLKMZ ang teoretikal nga pundasyon sang pagpamensar sang aton nga Partido kag teoretikal nga basehan sa pagtalana sang basehan nga linya sini. Ini ang siyensya nga naga-ubay sa proletaryo nga rebolusyon pakadto sa kadalag-an. Ini ang gamhanan nga armas sang proletaryado sa paghangup kag pagbag-o sa kalibutan. Ginatudlo sini ang mga obhetibo nga layi sang pag-uswag sang katilingban, ang mga pundamental nga interes sang proletaryado kag malapad nga masa sang anak-balhas, kag ang pagrebolusyon agud pukanon ang paghari sang mga reaksyunaryo kag pangibabawon ang gahum sang masa nga ginahimuslan kag ginapigos.

Sandigan nga katungdanan sang Komunista ang pagtuon sa MLKMZ bangud paagi lang sa husto nga pagtuon kag pagsapraktika sini mangin muklat siya sa matuod nga pusisyon sang sahi nga mamumugon sa katilingban kag kasaysayan, kag muklat kag malig-on niya nga mapatuman ang rebolusyonaryo nga linya kag mga taktika sang Partido. Solo nga sa pag-armas sa kaugalingon sang MLKMZ makabilog ang Komunista sang proletaryo nga panan-awan sa kalibutan kag makatungod siya sa mga katungdanan bilang muklat

kag abanse nga elemento sang proletaryado.

Suno gani sa "*Liwat nga Palig-unon ang Aton mga Basehan nga Prinsipyo kag Tadlungon ang mga Kasaypanan*":

Kinahanglan permi nga maathag sa aton ang aton nga teorya kag mga ideya. Kinahanglan permi nga maathag sa aton ang interes sang proletaryado kag sang pigos nga pumuluyo sa kaugalingon naton nga pungsod kag sa bilog nga kalibutan. Kinahanglan nga ipabilin kag dugang pa nga pauswagon ang aton Marxista-Leninista nga panindugan, panan-awan kag pamaagi. Dapat permi nga paayuhon ang aton nga kinaalam bahin sa materyalista nga pilosopiya, materyalismong istoriko, ekonomiya pangpulitika, siyentipiko nga sosyalismo, bag-o nga demokratiko nga rebolusyon, pagtukod sang partido, inaway banwa kag pagtukod sang nagahiliugyon nga prente.

Ang MLKMZ ang timon sa tanan nga hilikuton sang Partido. Maayo nga matungdan sang Komunista ang tanan nga katungdanan nga ginatalana sang Partido paagi lang sang paggamit sa rebolusyonaryo nga teorya sang MLKMZ agud ubayan ang rebolusyonaryo nga praktika kag paggamit sa diyalektiko kag istorikong materyalismo agud usisaon kag lubaron ang mga palaligban.

Paagi lang sa husto nga pagtuon kag pagpakasampaton sa MLKMZ mapataas ang ikasarang sang Komunista nga kilalahon ang matuod-tuod nga Marxismo kag tuhayon ini sa paltik nga Marxismo,

agud mapabilin ang pagbantay sa rebisyunismo kag oportunisto kag pungan ang pagpangibabaw sang mga ini sa aton Partido. Sa sini lang siya makapadugay nga indi madala sang waay untat nga pagsabwag sang makahililo nga impluwensya sang nanuhay-tuhay nga tipo sang ideolohiya nga burges kag pyudal.

Kon indi husto nga magtuon ukon magpakasampaton sa MLKMZ, ang Komunista magahulag nga bulag kag waay sang maathag nga direksyon. Madali siya nga magamuhan kag magtalang sa pasibud-sibod sang masingki nga banggianay sang mga sahi kag banggianay sang duha ka linya. Mahapos siya nga matiulang sang burgesya kag petiburgesya kag maganoy sang rebisyunismo kag oportunisto.

Ginpamatud-an sang malawig nga inagihan sang rebolusyong Pilipino, subong man sang kahublagan nga Komunista sa bilog nga kalibutan, nga kon husto nga naangot ang MLKMZ sa kongkreto nga praktika nagasulong ang rebolusyon. Nagaatras, nagakahalitan kag nagakapaslawan naman ini kon may mga malala nga paglihis sa MLKMZ kag nagabaskog ang impluwensya sang rebisyunismo kag oportunisto.

Ang paghangop sa MLKMZ indi gulpe nga maangkon sa pagpatapo sa Partido. Kinahanglan ang husto nga pagtuon, lubos nga pagpasakop sa rebolusyonaryo nga paghimakas, malig-on nga pagpakigbanggi sa rebisyunismo kag mga linya nga lihis, kag tayuyon nga pagsikway sa nabugtawan nga mga panan-awan kag mga pamensaron nga burges, agalon nga mayduta kag petiburges kag

wala sang untat nga ginapalapta sang kultura nga nagadominar sa sistema nga ginaharian sang imperyalismo kag mga papet nga daku nga burges-komprador kag agalon nga mayduta. Sa subong sini nga pamaagi lang mangin lubos nga katapu sang Partido indi lang sa organisasyon kundi bisan sa ideolohiya.

2. Ngaa matuod nga masakdag lang ang MLKMZ paagi sa pagdapat sang unibersal nga kamatuoran sini sa kongkreto nga praktika sang rebolusyong Pilipino?

Isa ka tampok nga kinaiya sang matuod-tuod nga proletaryo nga partido ang prinsipyo sang pag-angot sang teorya sa praktika, ang pagdapat sang MLKMZ sa rebolusyonaryo nga praktika. Waay sang iban nga pamaagi sang pagsakdag sa MLKMZ kundi ang hugot nga pagdapat sang unibersal nga kamatuoran sini, gamiton nga buhi nga ubay ang mga basehan nga rebolusyonaryo nga prinsipyo sini, sa kongkreto nga praktika sang rebolusyong Pilipino.

Ang solo nga kabangdanan kon ngaa nagatuon kita sang MLKMZ amo agud magamit ang panindugan, panan-awan kag pamaagi sini sa paglubad sa mga praktikal nga palaligban sang rebolusyon. Ini man ang solo nga pamaagi agud matuod nga mahangpan ang MLKMZ.

Waay sang kabilinggan ang teorya kag pagtuon sang teorya kon hamulag sa

rebolusyonaryo nga praktika. Sa pihak nga bahin, magapangakap sa dulom kag mapaslawan ang rebolusyonaryo nga praktika kon wala gina-ubayan sang teorya sang MLKMZ.

Ang yabi nga halambalanon sa pagdapat sang MLKMZ sa kongkreto nga praktika sang rebolusyong Pilipino amo ang husto nga pangkabilugan nga linya kag ang malig-on kag matinugahon nga pagsakdag sini. Kon sala ang pangkabilugan nga linya (pareho sa tion sang pagpangibabaw sang rebisyunista nga linya sang mga Lava sa daan nga gintingub nga partido) ukon indi gani mahuyang kag halog ang pag-uyat sa husto nga pangkabilugan nga linya (pareho sang pagsalamo sang husto kag sala nga linya sa tion sang programa para sa SCO sadtong dekada 80), ano man nga kadalag-an nga maagum sang rebolusyon mangin pahat-pahat kag temporaryo lang. Sa madugay kag madali, mabuy-an ang mga ini kag magapangibabaw ang mga kapaslawan, kahalitan kag pag-atras kon indi man lubos nga pagkawasak. Gani dapat unahon sa tanan ang pagseguro sa husto nga pangkabilugan nga linya kag malig-on kag husto nga pagsakdag sini.

Ginatudlo sang MLKMZ nga kinahanglan mag-umpisa permi sa obhetibo nga kamatuoran, hangpon ini kag sa ubay sang rebolusyonaryo nga teorya, italana ang husto nga banas sang pagsulong. Ang pangkabilugan nga linya sang demokratiko nga rebolusyon sang banwa nga una sa duha ka hut-ong sang rebolusyong Pilipino nakabase sa siyentipiko nga pag-analisa sa obhetibo nga kahimtangan nga malakolonyal kag malapyudal sang katilingban nga Pilipino. Ang kahustuhan sang

pag-analisa nga ini ginpamatud-an sang paliwat-liwat nga pangkatilingban nga pagpanayasat sa lain-lain nga lebel kag sakup, mga pagpanalawsaw sa kasaysayan kag subong nga kahimtangan, sang kongkreto nga praktika sang rebolusyong Pilipino, subong man sang pagtuon sa mga inagihan sang rebolusyon sa bilog nga kalibutan ilabi na sa mga kolonya kag malakolonya.

Ang pagdapat sang teorya sang MLKMZ sa kongkreto nga praktika nagakinahanglan man sang pagpataas sang praktika sa lebel sang teorya. Kinahanglan direkta nga magpasakup sa rebolusyonaryo nga praktika, sumahon ang mga inagihan kag magkuha sang mga rebolusyonaryo nga leksyon halin sa mga inagihan. Sa sini lang magadalom ang paghangop sa MLKMZ, mahimo man nga maka-amot sa kabang-manggad sang kinaalam sang MLKMZ.

Waay sang rebolusyon nga nagdaog nga wala nag-agi sa mga liko kag libot, nga wala nakaagi sang dalagku nga pag-atras kag kapaslawan antes matuod-tuod nga mangin sampaton sa pagpakigbato sa kaaway nga labaw katama sa kadakuon kag kusog. Ang importante indi mademoralisa, padayon nga maghimud-os sa rebolusyon, tampad nga magsaway sa kaugalingon kag maayo nga pagtuon sa mga nagligad nga kasaypanan agud indi maliwat sa palaabuton kag agud padayon nga mapasaka ang ikasarang nga makig-away. Waay sang pamaagi sang pagtuon sang teorya nga mas epektibo pa sangsa ginatudlo sang kaugalingon nga mapait nga inagihan.

Ang MLKMZ ang pangunahon nga armas naton sa

paglunsar kag pagsulong sang ikaduha nga dungganon nga kahublagan sa pagpanadlong. Ang kahublagan nga ini, sa pinaka-ubod, kahublagan sa pagtuon sa mga basehan nga prinsipyo sang rebolusyon nga Pilipino paagi sa pagsaway-sa-kaugalingon kag pagsikway sa mga malala nga paglihis kag kasaypanan. Katuyuan sini nga konsolidahon kag dugang nga pabaskugon ang Partido base sa MLKMZ kag pangkabilugan nga linya sang demokratiko nga rebolusyon sang banwa.

3. Paano pagapauswagong sang mga Komunista ang husto nga panan-awan sa pagtuon sa MLKMZ?

Sa tanan nga hilikuton, ang pagtuon sa MLKMZ ang dapat hatagan sang mga Komunista sang nagapanguna nga bug-at. Dapat man nga manguna sila sa rebolusyonaryo nga masa sa pagtuon sa MLKMZ kag mangin huwaran sa husto nga pagtuon.

Ang masunod amo ang pila ka pangunahon nga punto sa pagpauwagong sang husto nga panan-awan sa pagtuon:

- * Kinahanglan nga magtalana sang oras sa indibidwal kag kolektibo nga pagtuon kag magpadayon sang pagtuon sa tunga sang rebolusyonaryo nga paghimakas. Kinahanglan ang husto nga pag-uyat sa relasyon sang paghulag kag pagtuon. Kinaandan na nga

ginarason ang kawawad-on sang oras para sa pagtuon. Apang kon matuod nga tuman ka damo ang hilikuton nga dapat atubangon, nagakahulugan nga madasig nga nagauswag ang rebolusyonaryo nga sitwasyon kag nagasulong ang rebolusyon. Labi nga kinahanglanon kon amo ang pagpangita sang oras para sa pagbasa kag pagtuon agud makamentinar sang maathag nga pagpamensar, malig-on nga makasunod sa husto nga oryentasyon kag linya, makadungan sa sitwasyon nga madasig nga nagauswag kag maayo nga makatuman sa mga katungdanan.

- * Dapat mangin aktibo kag maukod. Hulu-halintang ang pagpadalom sang paghangop. Indi ini makuha sa makaisa nga pagbasa ukon pagtuon.

- * Dapat madaluman nga tun-an ang mga halambalanon. Indi bastante ang hapaw nga pagtuon kag pahapyaw nga paghangop sa ginabasa. Kinahanglan nga paliwat-liwat nga tun-an kag hibalong ang pundamental nga

ispiritu sang mga orihinal nga sinulatan nga Marxista-Leninista, iangot ini sa praktika kag magtinguha nga hangpon kag hakson ang mga ini.

* Mahimo nga mapangibabawan ang mga kabudlayan pareho sang manubo nga lebel sang literasiya kon kita handa nga magtuon sang lubos kag madaluman. Sa iban naman, ang palaligban sa pagtuon amo ang katamaron. Kon mabudlay basahon, basahon sang pila ka beses, kag magkonsulta sa iban nga kaupod kon kinahanglanon. Kon mabudlay nga hangpon, pamensaron sang pila ka beses kag magbasa sang iban pa nga talamdan.

* Ang pagtuon isa ka malawigan nga katungdanan. Indi ini makuha sa makaisa nga pagbasa, pagtambong sa isa ka pagtuon, ukon pagsaulo sang pila ka dinalan nga pulong. Kinahanglan ang tayuyon nga pagtuon kadungan sang pag-uswag sang rebolusyonaryo nga praktika kag mga pagbag-o sa obhetibo nga kahimtangan.

4. Ano ang rebisyunismo kag oportunisto? Ngaa dapat lubos nga pamatukan ang mga ini ?

Ang rebisyunismo amo ang sistematiko nga pagligwat sa mga basehan nga rebolusyonaryo nga prinsipyo sang Marxismo- Leninismo. Ang mga rebisyunista nagapostura nga mga Marxista nga kuno gusto nga himuon nga "napanahon" kag "matinugahon nga mapauswag" ang Marxismo agud sa pagkamatuod kuhaon ang rebolusyonaryo nga ispiritu sini. Ang pormal nga deklarasyon nila sang pagpati sa Marxismo pagpanglansi lang agud ipalapnag sa kahublagan sang mamumugon ang mga burges nga ideya nga anti-proletaryo kag anti-Marxista, pareho sang malinong nga ebolusyon sang kapitalismo pakadto sa sosyalismo.

Ang moderno nga rebisyunismo amo ang rebisyunismo nga nagtuhaw sa sulod sang mga sosyalista nga gobyerno kag mga partido komunista nga ara sa gahum. Sa esensya ini ang teorya kag linya sang pag-untat sang rebolusyon sa sosyalista nga katilingban, amat-amat nga pagpabalik sang kapitalismo kag pagpakighisugot sa imperyalismo kontra sa rebolusyon. Kon nakapangibabaw sa partido kag gobyerno, ang moderno nga rebisyunismo--pareho sang ginpamatud-an sang inagihan sang Unyon Sobyet kag Sidlangan nga Europa--magakadto sa ulihi nga bahin sa lubos nga pagbalik sang kapitalismo, diktadurya sang burgesya kag pagluhod-luhod sa imperyalismo.

Ang oportunismo amo ang pulitika sang makasahi nga pagpakighimbon: ang pagpapaidalum sang paghimakas sang mamumugon sa repormismo, parlamentarismo kag pungsodnon nga sobinismo, buot silingon, ang pagpaidalum sang kahublagan sang mamumugon sa interes sang burgesya nga lokal kag internasyunal. Naglapnag ang oportunismo sa mga ligal nga partido nga sosyalista sa Europa halin sang nagahingapos ang ika-19 nga siglo kag rebisyunismo ang nagserbe nga pangunahon nga salandigan sini sa teorya.

Ang oportunismo sa daan nga gintingob nga Partido Komunista sang Pilipinas pangunahon nga gintiglawas sang sunod-sunod nga pamunuan Lava. Ang pagpangibabaw sang ila nga oportunista nga linya sa Partido nagpugong sa malawig nga panahon sa pagtukod sang husto nga pangkabilugan nga linya sa rebolusyon, nagbunga sang malawig nga rekord sang mga malubha nga paglihis nga kapitulasyunista, kolaborasyunista kag parlamentarista nga ginasal-utan sa pila ka tion sang adbenturismo nga, kag sa ulihi nga bahin nagbunga sang likidasyon sang daan nga Partido kag hangaway sang banwa.

Halin sang nagpangibabaw sa Unyon Sobyet ang rebisyunista nga hubon Khrushchov, nangin masupog nga lokal nga ahente sang rebisyunismo ang hubon Lava nga naggamit sa mga kontra-rebolusyonaryo nga ideya sang rebisyunismo nga Khrushchov agud hatagan-rason ang pagpalagyo, pagdula sa Partido kag hangaway sang banwa, kag paglibod sang linya nga parlamentarista.

Agud liwat nga patindugon kag pabaskugon

ang Partido kag rebolusyonaryo nga kahublagan, ginakinahanglan ang liwat nga pag-umpisa sang mga proletaryo nga rebolusyonaryo sa halos waay bangud sa kadakuon sang pagpangwasak nga dulot sang rebisyunismo kag oportunisto sang mga Lava. Ginkinahanglan man ang lubos nga pagsikway sa rebisyunismo kag oportunisto nga Lava kag sa moderno nga rebisyunismo nga nakabase sa Unyon Sobyet, kag ang pagpapanibagong-kusog base sa MLKMZ.

Mapagsik nga nagsulong ang rebolusyonaryo nga kahublagan pagkatapos lubos nga malutos ang rebisyunismo nga Lava sa ideolohiya, pulitika kag organisasyon. Bisan pa man, liwat nga nagtuhaw kag nagbaskog sa sulod sang Partido ang mga pamensaron kag huyog nga oportunista halin sang nagahingapos ang dekada 70. Madamuan nga nagsulod ang mga elemento nga petiburges nga wala nag-agi sa husto nga Marxista-Leninistang edukasyon kag pagremolde kag napataas sa pusisyon ang mga kadre nga manubo ang lebel sa teorya--bunga sang malubha nga pagpabaya sang Partido sa edukasyon sa teorya kag pagtukod sa ideolohiya.

Halin sa ikaduha nga tunga sang dekada 70, agresibo nga ginhangkat kag gin-atake sang oportunista kag rebisyunista nga linya ang MLKMZ, ang pangkabilugan nga linya sang demokratiko nga rebolusyon sang banwa kag ang malawigan nga inaway banwa. Ang pagpangdiskaril sang rebisyunista kag oportunista nga linya gindunganan sang pangkabilugan nga opensiba sang kontra-rebolusyonaryo nga papet nga hangaway kag nagtuga sang waay katupong nga halit sa

rebolusyonaryo nga kahublagan sa kaumhan kag kasyudaran.

Umpisa pa kay Lenin, gintumod na sang mga proletaryo nga rebolusyonaryo ang makasahi nga esensya sang rebisyunismo kag oportunismo: kasangkapan ini sang burgesya kag iban pa nga reaksyunaryo nga sahi batok sa proletaryado kag rebolusyon. Indi mahimo nga maglawig ang paghari sang imperyalismo kag mga kahimbon sini nga reaksyunaryo kon waay ang serbisyo sang rebisyunismo kag oportunismo.

Ang pagtuhaw kag pagbaskog sang rebisyunismo kag oportunismo sa internasyunal nga kahublagan sang mamumugon sa panahon sang imperyalismo bunga sang hungod nga pag-engganyo kag pag-ayuda sang imperyalismo. Mga talalupangdon nga bahin sang padihot nga ini ang :

- * paggamit sang ultra-moderno nga mass media agud waay sang untat nga bombahan ang mga mamumugon, malaproletaryado kag iban pa nga anak-balhas sang ideolohiya nga petiburges
- * labi kahugot nga pag-ensirkulo, waay sang untat nga subersyon, pagsabotahe kag pagpang-ipit, sa mga pungsod nga sosyalista, kadungan sang pag-enggayo sa mga reporma nga kapitalista

kag sa mga elemento kag
huyog nga burges kag
petiburges; kag

* sa mga pungsod nga
kapitalista kag malakolonya,
paghupot sang gamay nga
saray sang mamumugon nga
ginasuhulan sang mga
pribilehiyo kag benepisyo
halin sa daku-daku nga
super-ganansya sang
monopolyo nga kapital, agud
magserbe nga base sang
rebisyunismo kag oportunismo
sa kahublagan sang
mamumugon.

Ginapamatud-an sang malawig nga inagihan
sang rebolusyonaryo nga kahublagan nga
proletaryo sa Pilipinas kag sa bilog nga
kalibutan nga matukod lang ang Marxista-
Leninista nga partido nga may ikasarang nga
magpamuno sa masa kag malig-on nga magsulong
sang rebolusyon sa kabuhi-kag-kamatayon nga
paghimakas kon mabinantayon kag lubos nga
nagapakig-away sa rebisyunismo kag oportunismo.
Sa pihak nga bahin, ang pabuyan-buyan kag
mahuyang nga pagtratar sa rebisyunismo kag
oportunismo nagabunga sang mga halit kag
kapahamakan sa Partido kag rebolusyon.

Sandigan nga katungdanan sang kada matarung
nga Komunista ang malig-on kag militante nga
paghimakas sa rebisyunismo kag oportunismo.
Dapat magpakasampaton sa pagtumod sa sari-sari

nga huyog nga nagapakuno-kuno nga Marxista kag nagamaskara sa "pagpapino" kag "pagpauswag" sang linya sa "nagabag-o" nga sitwasyon. Sa nagasingki nga krisis sang imperyalismo kag sang lokal nga reaksyon, magahimo kag magahimo sila sang pamaagi agud gamuhon ang rebolusyonaryo nga pwersa kag ang pumuluyo, patalangon ang rebolusyon kag paluyahon ini kon indi man malutos agud mabuhinan ang ila nga krisis.

Dapat hublasan sang maskara ang mga pagpakuno-kuno nga ini sa guwa kag bisan sa sulod sang Partido agud labi pa nga mapalig-on ang Partido kag ang mga rebolusyonaryo nga pwersa kag masulong ang rebolusyon tubtub sa kadalag-an.

Agud pamtukan ang rebisyonismo kag oportunisto, kinahanglan nga ihayag ang reaksyonaryo nga kinaiya sini kag pahulagon ang masa sa pag-atake kag pagsikway sa mga ini. Indi mapangibabawan kag madula ang isa ka sala nga linya sa pulitika kag ideolohiya paagi lang sang isa o duha ka pagsaway. Kinahanglan ang malawigan kag paliwat-liwat nga paghimakas. Kinahanglan ang malig-on nga pag-uyat sa pangkabilugan nga linya sang Partido, ang madalum nga paghangup sa esensya sini kag ang madaluman nga pagsaway kag pagsikway sa rebisyonismo kag oportunisto.

5. Ngaa nga samtang may mga sahi kag banggianay sang mga sahi, indi mag-untat ang katungdanan sang mga Komunista nga sakdagon

ang Marxismo kag pamatukan ang rebisyunismo?

Samtang may mga sahi kag banggianay sang mga sahi, may banggianay sa ekonomiya kag pulitika, bagay nga ginasalaming man sa banggianay sa patag sang kultura kag ideolohiya. Sa subong nga panahon matalum ini nga makita sa banggianay sa tunga sang proletaryo nga rebolusyonaryo nga pamensaron kag panan-awan sa kalibutan kag reaksyunaryo nga burges nga pamensaron kag panan-awan sa kalibutan.

Sa katilingban nga ginaharian sang mga sahi nga manughimulos kag manugpigos, mabudlay kag marikot ang pagpakigbanggi sa reaksyunaryo nga panan-awan sa kalibutan. Kon napukan na ang pangpulitika kag pang-ekonomiya nga gahum sang mga sahi nga manughimulos kag manugpigos, wala naga-untat kundi labi nga naga-igting ang banggianay sang mga sahi. Kon mag-untat sa pagtuon kag pagpalapanag sa proletaryo nga panan-awan sa kalibutan kag pagpamatuk sa reaksyunaryo nga burges nga pamensaron kag panan-awan sa kalibutan, ang mga proletaryo nga rebolusyonaryo kag ang masa nga ginahimuslan madulaan sang ikasarang sa pag-away sa mga impluwensya nga burges kag pyudal.

Ang banggianay sang mga sahi indi mapunggan nga maglapos kag maglanog sa sulod sang Partido, sa porma sang banggianay sang duha ka linya: sang proletaryo nga rebolusyonaryo nga linya kag sang linya nga rebisyunista kag oportunistista. Ini layi sang kabuhi sa

katilingban nga guwa sa kagustuhan sang sin-o man.

Ang proletaryo nga partido nagahulag sa katilingban nga may mga sahi kag indi hilway sa impluwensya sang mga pamensaron sang iban nga sahi. Ang mga impluwensya nga ini dala-dala man sang mga narekluta sa Partido nga waay sang iban nga ginhalinan kundi ang hilaw nga materyales nga tuga sang daan nga katilingban nga garuk. Indi dapat mangin romantiko, sa baylo, dapat gamiton ang diyalektiko nga materyalista nga panan-awan sa pagtan-aw sa Partido.

Permi nga may banggianay sa tunga sang proletaryo nga rebolusyonaryo nga linya kag sang reaksyunaryo nga linya nga burges sa sulod sang partido komunista bisan sa putuk-putukan sang pinakamaayo nga kahimtangan sini. Sa poder man o waay pa, ang partido komunista permi nga malab-ot sang isa ka lebel sang impluwensya sang indi nagbag-o nga mga elemento nga petiburges sa sulod kag guwa sang partido.

Gani yabi nga halambalanon sa pagtukod sang matuod-tuod nga Marxista-Leninista nga partido ang pagtukod sa ideolohiya. Ang padayon nga pagpalig-on kag pagpapataas sang kamuklatan nga Marxista-Leninista-Maoista kag ang padayon nga pagbantay kag paghimakas sa rebisyunismo kag oportunismo ang pinakamalahalon nga katungdanan agud maseguro nga nagapursigir ang Partido sa husto nga rebolusyonaryo nga banas. Gani pinakamalahalon nga katungdanan sang kada Komunista ang hugot sa tagipusuon kag tayuyon nga pagbag-o paagi sa pagtuon kag pagsakdag sa

Marxismo kag pagpamatuk sa rebisyunismo kag oportunisto.

B. ANG KAWSA SANG BUG-OS KAG LUBOS NGA PAG-ALAGAD SA PUMULUYO ANG KABUG-USAN SANG PANAN-AWAN SA KALIBUTAN SANG KOMUNISTA.

- 1. Ngaa pundamental kag desaysibo sa kada proletaryo nga rebolusyonaryo ang pamangkot nga "para kay sin-o?"**

Ang proletaryo nga kahublagan amo ang kaugalingon nga kahublagan sang malapad nga mayorya sang masa nga anak-balhas sa pagpamuno sang mamumugon para sa interes sang malapad nga mayorya. Sa kasaysayan, ini ang una nga kahublagan sang masa nga anakbalhas nga wala naga-ikog kag nagaserbi sa burgesya o ano man nga sahi nga nagapanghimulos. Ultimo nga katuyuan sini nga dulaon ang pagpanghimulos sang tawo sa tawo, hilwayon ang sahi nga mamumugon paagi sa paghilway sa bilog nga katawhan nga ginahimuslan kag ginapigos.

Ang kawsa nga ini ang ara sa pinaka-ubod sang katuyuan sa pagtukod sang proletaryo nga partido. Ini ang ginaumpisahan sang tanan anga aksyon sang Partido kag mga Komunista. Ang

programa kag ultimo nga katuyuan sang Partido nagasalaming sa konsentrado nga pamaagi sang pundamental kag malawigan nga interes sang proletaryado kag malapad nga masa nga anak-balhas.

Para sa tanan nga proletaryo nga rebolusyonaryo, ang halambalanon sang "para kay sin-o?" ang pinakapundamental nga salandigan sang tanan nga iya nga ginahimo-- gamay man o daku nga katungdanan, pagtuon man o praktikal nga hilikuton.

Isa lang ang sabat sang mga Komunista sa pamangkot "para kay sin-o?": Para sa sahi nga mamumugon kag malapad nga masa sang pumuluyo. Bug-os kag lubos nga pag-alagad sa pumuluyo kag indi para sa makinaugalingon nga interes o makitid nga interes sang ano man nga minorya nga hubon.

Ang pag-alagad sa interes sang mga imperyalista, daku nga burgesya nga komprador, mga agalon nga mayduta, burgesya, ukon indi gani sang petiburgesya--kag indi sang proletaryado kag malapad nga masa nga anak-balhas--lunsay pag-alagad sa makinaugalingon nga interes kag makitid nga interes sang minorya nga hubon.

Ang rebolusyon sa subong nga panahon ang pinakamatalom nga banggianay sa tunga sang pila lang nga nagapanghimulos kag sang nagapamigos kontra sa daku nga mayorya sang ginahimuslan kag ginapigos. Tanan nga proletaryo nga rebolusyonaryo maathag nga ara sa bahin sang daku nga mayorya nga ginahimuslan kag ginapigos

kag malig-on nga kaaway sang pila lang nga nagapanghimulos kag nagapamigos.

Ginaseguro sang Komunista paagi sa kongkreto nga pag-analisa sa mga halambalanon kag ubay sang siyentipiko nga teorya sang MLKMZ nga ang iya nga ginahimo naga-alagad sa proletaryado, malapad nga masa sang anak-balhas kag rebolusyon. Ini ang pinakapundamental nga halambalanon kag pagsulundan: Ini bala makapabaskog o makapaluya sa rebolusyon, sa sahi nga mamumugon kag sa malapad nga masa nga ginahimuslan kag ginapigos. Para sa Komunista, ang halambalanon nga ini nagapanalupsop sa tanan nga halambalanon; ano man ang iya nga pamensaron kag himuon, dapat muklat nga ginahimo nga may maathag nga iwag sang pagsulundan nga ini.

2. Ano ang kahulugan sang bug-os kag lubos nga pag-alagad sa pumuluyo ?

Ang bug-os kag lubos nga pag-alagad sa pumuluyo amo ang prinsipyo sang pagpapaidalum sang interes sang indibidwal kag pila sa interes sang kabilugan kag kadam-an. Ini ang prinsipyo nga nagabug-os sang ispiritu nga komunista--ang paghandum sang kaayuhan indi para sa kaugalingon kundi para sa pumuluyo--subong man sang ispiritu kag prinsipyo sang Partido.

Ang pag-alagad sa pumuluyo amo ang pagsakdag pirme sa obhetibo nga interes sang pumuluyo nga konsentrado nga ginasalaming sa

lina kag programa sang Partido. Kon amo, ang paghalad sang bug-os nga kabuhi sa lubos nga pagsulong sang rebolusyon amo ang bug-os kag lubos nga pag-alagad sa pumuluyo.

Ang pag-analisa sa tanan nga bagay halin sa proletaryo nga panindugan kag panan-awan amo ang pag-analisa halin sa punto de bista kag interes sang pumuluyo. Pagsikway ini sa burges nga panindugan kag panan-awan, bangud nga kon ang kawsa sang pag-alagad sa pumuluyo ang kabug-usan sang proletaryo nga panan-awan sa kalibutan, pagka-makinaugalingon kag indibidwalismo naman ang sa burges nga panan-awan sa kalibutan.

Ang prinsipyo sang pag-alagad sa pumuluyo nagakahulugan man sang pag-ugat sang madalum kag indi paghamulag san-o man sa masa sang pumuluyo.

Nagakahulugan ini sang pagsikway sa pagka-makinaugalingon, ang permi na lang nga pagpamensar sa kaugalingon, ang pagkonsiderar lang sa kaugalingon, ang paghandom sang kabantugan, sang kapuslanan sa kaugalingon, sang gahum kag pusisyon.

Nagakahulugan ini sang waay kutod nga pagpakamalahalon sa katungdanan, sang pagbalewala sa kabudlayan kag sakripisyo, sang lubos nga pagsulong sa rebolusyon kag interes sang masa, kabuhi man ang ihalad.

Nagakahulugan ini sang pagpursigir sa husto kag pagpanadlong sa sala, para sa interes sang pumuluyo.

Nagakahulugan ini sang malig-on nga pagpakig-isa sa mga kaupod kag paghugpong sang pumuluyo agud maagum ang ululupod nga rebolusyonaryo nga katuyuan.

Ang prinsipyo nga ini ang gamhanan nga armas sang mga Komunista sa pagpangibabaw kag pagdula sa pagka-makinaugalingon, pagpatubo sa lubos nga katampad sa rebolusyonaryo nga kawsa kag pagbag-o sa kaugalingon.

3. Ano ang kahulugan sang wala-kutod nga pagpakamalahalon sa katungdanan ?

Ang wala-kutod nga pagpakamalahalon sa katungdanan amo ang pagpangabuhi sa ispiritu sang bug-os kag lubos nga pag-alagad sa pumuluyo.

Nagakahulugan ini sang paghangop sa katungdanan, sa kamalahalon kag papel sini sa kabilugan; sang lubos, maukod kag pasyensyoso nga pagtuman sini, gamay man o daku, mahapos man o mabudlay, sa malab-ot sang ikasarang; sang mapagsik kag aktibo nga paghulag; kag sang boluntad nga pag-ako sang responsibilidad.

Nagakahulugan ini sang pagsikway sa mekanikal nga pagtuman sa katungdanan nga indi nahangpan; sang pagsikway sa pahapyaw kag padasu-daso nga pagtuman sa hilikuton.

Supak sini ang pagpili sang hilikuton nga

gamay kag mahapos nga masarangan naman ang daku kag mabudlay apang malahalon nga katungdanan--bangud indi man naton handum ang kabantugan ukon kasulhayan para sa kaugalingon. Supak sini ang pagpangluya, pabuyan-buyan, ang pagka-demoralisa sa atubang sang problema kag kabudlayann. Kabaliskaran sini ang indi pagboluntad bisan nga may nakita nga malahalon nga bagay nga dapat iplastar, desisyunan kag aksyunan.

Tanan nga nasambit nga supak sa waay-kutod nga pagpakamalahalon sa katungdanan nagauk-ok sa bug-os kag lubos nga pag-alagad sa pumuluyo kag magakadto sa pagtalikod sini kon indi gilayon mapamatukan kag mapangibabawan.

4. Ano ang husto nga panan-awan sang Komunista sa mga kabudlayan, sakripisyo, sa ipit-ipit kag kamatayon?

"Diin man may paghimakas may sakripisyo, kag kinaandan nga hitabo ang kamatayon. Apang hugot nga ginabatyag naton ang interes sang pumuluyo kag ang mga pag-antus sang malapad nga mayorya, kag kon nagabuhis kita sang kabuhi para sa pumuluyo, ini makahulugan nga kamatayon. Bisin pa man, kinahanglan nga himuon naton ang tanan agud malikawan ang mga sakripisyo nga indi kinahanglanon." Ginatumod sang mga pulong nga ini ni Kaupod Mao Zedong ang basehan nga aktitud sang proletaryo nga rebolusyonaryo sa sakripisyo kag kamatayon.

Ang kabudlayan, ipit-ipit, sakripisyo kag

kamatayon indi malikawan nga bahin sang rebolusyon. Ang pag-atubang sa mga ini kon kinahanglanon nga wala sang pagpang-alang-alang kag pagpangduha-duha ang husto nga panindugan sang Komunista. Isa ka pamatuod ini sang bug-os kag lubos nga pag-alagad sa pumuluyo kag rebolusyonaryo nga indi makinaugalingon.

Muklat ang katampad kag kaisog sang Komunista: ginalikawan ang indi-kinahanglanon nga sakripisyo kag kamatayon agud labi pa nga isulong ang rebolusyon kag labi pa nga maka-alagad sa interes sang pumuluyo. Gina-amligan sang Komunista ang kahimtangan, kaluwasan kag kabuhi sang masa, sang kapareho nga rebolusyonaryo, kag sang kaugalingon agud mapreserba kag dugang nga magbaskog ang rebolusyonaryo nga mga pwersa.

Supak sa husto nga aktitud sang isa ka Komunista sa kabudlayan, ipit-ipit, sakripisyo kag kamatayon ang pagpangindi sa hilikuton nga mabudlay kag paghandom lang sang hilikuton nga mamag-an kag kahimtangan nga halog; ang pagpangindi sa kinahanglanon nga sakripisyo; ang pagpangluya bangud sa mga kabudlayan; ang pagkaspasibo sa atubang sang ipit-ipit sa baylo nga mag-analisa sa kahimtangan kag maglubad sa palaligban; kag iban pa.

**K. ANG KOMUNISTA DAPAT
MAGPAKASAMPATON SA
PAGPAKIG-ISA SA MALAPAD
NGA MAYORYA SANG PUMULUYO**

KAG MGA KAUPOD.

- 1. Ngaa kinahanglan nga magpakasampaton ang Komunista sa pagpakig-isa sa malapad nga mayorya sang pumuluyo ?**

Matungdan lang sang Partido ang istoriko nga katungdanan nga pamunuan ang proletaryado kag malapad nga masa sang pumuluyo sa paghimakas batuk sa imperyalismo, pyudalismo kag burukrata kapitalismo paagi sa pagtukod sang malig-on nga pagpakig-isa sa malapad nga mayorya sang pumuluyo. Agud magsulong kag magdaog sa rebolusyon, nagasalig ang Partido sa kahustuhan sang iya nga linya pangpulitika, kabakod sang iya nga organisasyon kag kalaparon kag kadalumon sang angot sa masa sang pumuluyo.

Ang rebolusyon isa ka pangmasa nga paghulag; mapadaog lamang ini kon matukod ang paghiliusa sang pumuluyo sa pagpamuno sang Partido base sa husto nga linya. Sandigan nga katungdanan sang Partido kag sang kada Komunista ang pagpukaw, pag-organisa kag pagpahulag sa pumuluyo para sa demokratiko nga rebolusyon sang banwa.

Halambalanon nga kabuhi-kag-kamatayon para sa proletaryo nga rebolusyonaryo ang hugot nga angot kag pagpakig-isa sa masa. Ano man kadaku ang kabudlayan, ano man kabug-at ang palaligban nga gina-atubang sang rebolusyon, pat-ud nga mapangibabawan kag malubad lamang, matapos

mabilog ang husto nga pag-analisa, paagi sa paghiliusa sang pumuluyo kag paghiliusa sang pumuluyo kag mga Komunista. Sa sini lamang matukod ang malig-on, militante, kag mala-higante nga gahum nga makalutos sa kaaway kag magalubad sa mga palaligban kag kabudlayan.

Sa pihak nga bahin, kon indi mapukaw, maorganisa kag mamobilisa ang masa, kon indi magpakig-isa ang mga Komunista sa malapad nga mayorya sang masa--waay sang kusog ang masa, ang Partido kag rebolusyon. Pagadaug-daogon sila sang mga reaksyunaryo. Mangin inutil ang Partido: Pagaanud-anoron ukon pagabayaan ini sang dalayon nga dalagan sang katilingban, sa baylo nga aktibo nga mag-impluwensya ini. Indi ini makapabaskog kag laban-laban pa nga madugmok sang mga reaksyunaryo.

Yabi sa pagtukod sang paghiliusa sang Partido kag pumuluyo ang husto nga linya pangpulitika. Ini ang matuod nga nagahakos sa obhetibo nga interes sang pumuluyo. Kon amo sini, ini ang basehan sa pagtukod sang matuod kag mabakod nga paghiliusa sang pumuluyo kag pagpakig-isa sang Partido kag mga Komunista sa pumuluyo. Ang pagpahangup sang husto nga linya nga ini sa masa, ang pagpangabuhi sini sa ila rebolusyonaryo nga hilikuton kag paghimakas tubtob hakson kag sakdagon nila bilang kaugalingon nila: ini ang basehan sang hugot nga pagpakig-angot sang proletaryo nga rebolusyonaryo sa masa.

Ginapabakod sang husto nga mga katungdanan, polisiya kag estilo sang pagtrabaho ang angot

sang Partido sa masa bangud nagasanto ang mga ini sa interes kag kagustuhan sang masa. Ginahamulag naman sa masa sang mga sala nga katungdanan, polisiya, kag estilo sang pagtrabaho ang mga proletaryo nga rebolusyonaryo bangud nagabunggo ang mga ini sa interes kag kagustuhan sang masa.

2. Ano ang linya pangmasa kag husto nga basehan nga aktitud sa masa?

Ang hugot nga angot sa masa isa ka tampok nga kinaiya sang matuod-tuod nga Marxista-Leninistang Partido. Gina-ubayan ini sang MLKMZ kag sang linya pangmasa; ang hugot nga angot sa masa ang kongkreto nga ekspresyon sang proletaryo nga kinaiya sini.

Ang linya pangmasa amo ang prinsipyo sang bug-os kag lubos nga pagsalig kag pagsandig sa malapad nga masa sa pagsulong sang rebolusyon kag tanan nga hilikuton sa rebolusyon. Basehan nga Marxista nga panindugan kag panan-awan nga ang masa ang tag-tuga sang tanan nga materyal kag kultural nga manggad sang katilingban kag matuod-tuod nga tag-tuga sang kasaysayan. Ang masa ang matuod-tuod nga baganihan; ang ila nga paghimakas kag praktika pangkatilingban ang tuburan sang rebolusyonaryo nga pamensaron kag rebolusyonaryo nga teorya.

Ang masa ang pangunahon nga pwersa nga nagasulong sa ano man nga rebolusyonaryo nga kahublagan. Kon waay sang pagsakdag kag aktibo nga pagpasakop nila, indi san-o man maagum ang

rebolusyonaryo nga katuyuan. Ang matuod-tuod nga proletaryo nga rebolusyonaryo nga partido lubos nga nagasandig sa rebolusyonaryo nga ispiritu kag pagka-matinugahon sang masa kag sandig diri permi nga ginaseguro ang pinakahugot nga angot sa ila. Ginatum-ukan sini nga dapat magsalig ang rebolusyon sa masa sang pumuluyo kag sa pagpahulag sang madamo. Ginapamatukan sini ang pagsalig sa pila lang nga "maalam" kag sampaton nga mandu lang nga mandu.

Agud masakdag ang linya pangmasa, kinahanglan nga itanom sa dughan ang interes sang pumuluyo sa tanan nga tinion, sa tanan nga hilikuton, daku man o gamay; hugot nga mag-angot sa ila kag matutom nga pukawon, organisahon kag pahulagon sila para sa rebolusyon. Kinahanglan nga pataason ang lebel sang kamuklatan sang masa kag organisahon sila agud mabilog ang ila organisado nga kusog kag organisado nila nga maatubang ang mga palaligban kag paghimakas. Kinahanglan nga pahulagon sila para sa rebolusyon santo sa lebel sang ila nga kahandaan kadungan sang matutom nga pagpataas sang lebel nga ini.

Paagi lamang sa hugot nga angot sa masa madaluman nga mahakos sang mga proletaryo nga rebolusyonaryo ang kawsa kag balatyagon sang masa. Sa sini man lamang kumprehensibo nga mahangpan ang ispiritu, kaundan kag basehan sang rebolusyonaryo nga linya kag mga polisiya sang Partido. Kadungan sini, ang hugot nga angot sa masa ang garantiya nga ang rebolusyonaryo nga linya kag mga polisiya sang Partido mapatuman sang husto, pursigido kag lubos.

Sa pihak nga bahin, ang husto nga linya kag polisiya ang nagaseguro sang hugot nga angot kag pagpakig-isa sa masa. Ang mga paglihis sa husto nga rebolusyonaryo nga linya nagadulot sang kahalitan sa Partido kag pumuluyo, nagahamulag sang Partido sa pumuluyo, kag mahimuslan sang imperyalismo kag lokal nga reaksyon kontra sa interes sang pumuluyo kag rebolusyon.

3. Ngaa malahalón ang ispiritu sang hugot sa buot nga tumuluon sang masa, ang pagtuon sa masa kag pagkonsulta sa ila kon may gina-atubang nga halambalanon?

Bilin ni Mao Zedong:

"Sa tanan nga praktikal nga hilikuton sang aton Partido, tanan nga husto nga pagpamuno kinahanglan nga `halin sa masa, balik sa masa.ÄNagakahulugan ini nga kuhaon ang mga pamensaron sang masa (mga lapta-lapta kag indi sistematiko nga pamensaron) kag tipunon ang mga ini (paagi sa pagtuon himuon nga bilog kag sistematiko nga pamensaron), pagkatapos magkadto sa masa kag palapnagon kag ipaathag ang mga pamensaron nga ini tubtub nga ang mga ini ila angkunon, hugot nga uyatan kag isalhin nila sa paghulag, kag tilawan ang kahustuhan sang mga pamensaron nga ini paagi sa sini nga

paghulag. Pagkatapos, liwat nga tipunon ang mga pamensaron halin sa masa kag liwat nga magkadto sa masa agud ang mga pamensaron maduso kag mapaluntad. Kag ini padayon, paliwat-liwat sa waay katapusan nga pagtiyog-pataas, samtang ang mga pamensaron labi nga mangin husto, labi nga may kabuhi kag manggaranon sa kada pagtiyog-pataas..."

Makita sa bilin nga ini ang demokratiko nga estilo sang pagtrabaho kag pagpamuno nga sandig sa linya pangmasa. Ginatudlo sini ang pagkonsulta sa mga kaupod kag sa masa, ang pagpamati sa tanan nga sari sang opinyon, bisan sa mga opinyon nga kabanggi.

Tuman kamalahalon sang demokratiko nga estilo sang pagtrabaho kag pagpamuno bangud paagi lamang sini lubos nga mabuyok ang rebolusyonaryo nga inisyatiba kag pagkamatugahon sang masa kag husto nga matipon ang ila nga kinaalam.

Kon indi pamilyar sa palibot, kulang sa inagihan ukon indi gani may nagatuhaw nga mga palaligban sa paghulag, mapainubuson nga magpamangkot sa masa kag magpamati sa ila nga opinyon. Kon pamilyar na sa palibot, madamo sang inagihan ukon nagasulong ang hilikuton, kinahanglan man nga magpamati sa opinyon sang masa kag likawan ang pagka-bugalon bangud kon indi mahamulag kita sa masa. Limitado ang personal nga kinaalam kag praktikal nga inagihan sang sin-o man, kag indi makapalain, kundi

makabulig pa gani ang magkonsulta sa iban kag mangin demokratiko sa pagpamuno kag estilo sang pagtrabaho.

Kinahanglan nga pamatian man ang mga opinyon sang minorya. Mahapos nga mamati sa opinyon sang mayorya nga sa masami husto ukon relatibo nga mas husto bangud gina-analisa sini ang halambalanon sa lain-lain nga anggulo kag makabulig sa aton nga paghangup sa esensya sang mga bagay. Bisan man, nagakatabo man nga ang kamatuoran labi nga nahangpan sang minorya. Ginasalaming sang mayorya kag minorya ang numero lang kag indi ang esensya sang halambalanon nga gina-analisa. Ang pinakamalahalon nga punto makita kon nagasanto sa MLKMZ ang opinyon ukon indi.

Subong man, kinahanglan nga mapainubuson nga magpamati sa kabanggi nga opinyon. May mga kahigayunan nga ini ang husto ukon relatibo nga mas husto sangsa sa aton nga opinyon. Makabulig man ang subong sini nga pagpamati sa pagtan-aw sa mga halambalanon sa iban nga anggulo kag sa sini, sa pagpadalom sang paghangop sa ginaatubang nga halambalanon.

Ang Komunista boluntad nga ginakabig ang kaugalingon bilang tumuluon sang masa. Nagatuon siya sa masa. Gani, mapadalom ang paghangup sa kahimtangan kag interes sang masa, mahangpan ang bastante kag pinakamaayo nga polisiya kag estilo sang pagtrabaho, kag makalikaw sa dalagku nga kahuyangan kag kasaypanan. Paagi sa boluntad nga pagka-tumuluon sang masa, dugang nga mangin epektibo ang aton nga pagtudlo sa ila, labi nga

madasig nila nga mahangpan ang mga rebolusyonaryo nga pagtulun-an.

4. Ngaa kinahanglan nga magpakasampaton ang Komunista sa pagpakig-isa sa malapad nga mayorya sang mga kadre kag katapu sang Partido?

Solo nga ang isa ka nagahiliusa nga Partido ang makahugpong sa malapad nga masa kag makatukod sang gamhanan nga rebolusyonaryo nga hangaway nga magapadaog sa rebolusyonaryo nga paghimakas. Ang hugot nga paghiliusa sang mga kaupod sa sulod sang Partido base sa MLKMZ, pangkabilugan nga linya kag estratehiya kag mga polisiya sini ang magaseguro sa pagkasolido sang organisasyon sang Partido.

Agud maayo nga mapatuman ang aton nga mga hilikuton, kinahanglan nga magpakig-isa sa malapad nga mayorya lunsay sa sulod kag sa guwa sang Partido. Ang pagpakig-isa sa malapad nga mayorya sang pumuluyo, ang malig-on nga paghiliusa sang Partido kag pumuluyo matukod lamang kon malig-on ang paghiliusa sang mga katapu sang Partido. Indi makapamuno ang isa ka partido nga pahak-pahak kag wala nagahiliusa. Malahalon nga paktor sa pagtukod sang nagahiliusa nga partido ang ispiritu nga partidista sang mga Komunista, ang ispiritu sang pagpakighiliusa sa malapad nga mayorya sang mga kadre kag katapu sang Partido.

Ang malapad nga mayorya sang mga kadre kag katapu sang Partido mga tampad nga Komunista, nagasakdag sang MLKMZ kag husto nga linya kag polisiya sang Partido, kag tampad nga nagahiwat sang pagsaway kag pagsaway-sa-kaugalingon. Pila lamang lamang ang nagasayup apang indi magtadlong. Pila lamang ang masupog nga oportunistang kag mapangsipak.

Kon amo, ang katungdanan nga magpakighiliusa sa malapad nga mayorya katuwang sang katungdanan nga awayon ang oportunismo kag pagpangsipak. Maathag nga ginapakita sang aton inagihan nga ang ara sa pinaka-ubod sang mga hilikuton sang mga mapangsipak, sang mga paksyunalista, amo ang pagtalikod sa MLKMZ, paglihis sa pangkabilugan nga linya pangpulitika sang Partido kag pagduso sang rebisyunismo, oportunismo kag repormismo agud patalangon ang masa.

Ang pagpakighiliusa sa malapad nga mayorya sang mga kadre kag katapu sang Partido makita sa mainit kag maki-kaupod nga pagtrato sa tanan nga kaupod, sa pagka-mabinuligon kag madinumdomon, sa pagbulig sa mga kaupod agud mapataas ang ila lebel sang kamuklatan kag ikasarang. Makita ini sa husto nga pagtratar kag pagpakighiliusa sa mga kaupod nga may panan-awan nga lain sa aton, relatibo nga naga-kaulihi, ukon indi gani may kahuyangan ukon nagsayup. Makita ini sa pagpalig-on sang paghiliusa base sa MLKMZ, husto nga linya kag polisiya.

5. Ngaa solo nga sandig sa MLKMZ

**mahimo matukod ang matuod-tuod
kag malig-on nga paghiliusa sang
mga proletaryo nga
rebolusyonaryo?**

Ang malig-on nga paghiliusa amo ang paghiliusa santo sa prinsipyo--nakabase sa MLKMZ, sa pangpulitika nga linya sang Partido kag mga polisiya sini. Ang paghiliusa santo sa prinsipyo ang garantiya nga mapatuman ang linya kag polisiya sang Partido. Ang paghiliusa sa katuyuan kag panindugan ang makaseguro sa paghiliusa sa desisyon kag aksyon.

Para matukod ang malig-on nga paghiliusa santo sa prinsipyo, kinahanglan ang tayuyon nga pagpadalom sang paghangup sa MLKMZ kag sa linya kag polisiya sang Partido, ang pagpursigir sa mga ini bangud ini ang basehan nga garantiya sa kadalag-an sang rebolusyon, ang pagdapat kag pagpartikularisa sini sa ispisipiko nga katungdanan kag hilikuton nga ginaatubang, kag ang indi paglihis bisan sa isa ka tinion.

Ang MLKMZ, linya kag polisiya sang Partido ang naga-ubay sa tanan naton nga hilikuton. Ang hugot nga pagsakdag sa mga ini ang ultimo nga talaksan sa aton nga paghulag kag sa pagtasa sa aktitud kag paghulag sang mga indibidwal nga Komunista kag pagtungod sa katungdanan sang mga yunit sang Partido.

Indi tubtub san-o makatukod sang hugot nga paghiliusa, kag kinahanglan nga likawan ang paghiliusa nga waay sang prinsipyo. Kon

magpakighiliusa nga indi nakabase sa MLKMZ, sa linya kag polisiya sang Partido, mabudlayan kita nga tuhayon ang kaaway sa aton nga kaugalingon, subong man ang husto sa sala. Paano nga mangin malig-on ang paghiliusa sa tunga sang mga kaupod nga lubos nga nagasakdag sa MLKMZ kag mga rebisyunista nga traidor nga nagapati nga lipas na ang MLKMZ kag wala na nagapati sa kahustuhan sini? Paano matukod ang paghiliusa sang mga kaupod nga lubos nagasakdag sang pangmalawigan nga inaway banwa kag sang mga oportunistang traidor nga waay sang hawid-hawid nga naga-atake sa inaway banwa kag nagapakagamay sa rebolusyonaryo nga kinaiya sang masa nga mangunguma sa Pilipinas?

Matukod lamang ang malig-on nga paghiliusa sang mga Komunista paagi sa pagbuyagyag sa rebisyunismo kag oportunismo base sa MLKMZ, linya kag polisiya sang Partido; indi paglikaw sa banggianay nga kinahanglanon; kag tampad nga pagsunod sa pagsulundan nga "magpakighiliusa, indi magpangsipak" sa lubos nga pagsaway kag pagpamatuk sa sala nga linya.

6. Ano ang husto nga aktitud sa mga kaupod nga may lain nga panan-awan sa aton, relatibo nga nagaka-ulih, ukon indi gani nagsayup?

Dapat magpakasampaton ang kada Komunista sa pagpakighiliusa kag pagpakigbuligay sa mga kaupod nga may lain nga panan-awan sa iya.

Normal ang pagluntad sang mga pagkatuhay sang panan-awan sa sulod sang Partido. Ang mga katapu sang Partido lain-lain ang sahi nga ginhalinan, lugar nga gingikanan, gawi nga ginbugtawan, kag lebel sang gintun-an.

Kinahanglan nga lantawon sang Komunista ang mga kinatuhay nga ini halin sa husto nga panindugan, gamiton ang MLKMZ agud analisahon ang mga ini, kag palig-unon ang paghiliusa paagi sa pag-umpisa sa handum nga maghiliusa, pagbanggianay sang mga ideya kag paglubad sini santo sa husto kag sala, kag pag-agum sang dugang nga mataas nga lebel sang paghiliusa.

Kon ara sa bahin nga sala, ang Komunista mapainubuson nga nagabaton sa opinyon sang iban, nagabaton sa mga pagsayup kag nagapanadlong sa mga ini. Sala, kag indi santo sa espiritu nga Komunista, ang pagpangindi sa pagbaton sang kasaypanan bangud sa kahadlok nga mahuy-an ukon indi gani magpakatig-a bisan sala kag magpanago sa pagrason nga tiko.

Kon ara naman sa husto, ang Komunista mapasyensyoso nga nagabulig sa iban paagi sa mahalang nga hilikuton pangpulitika kag pang-ideolohiya agud amat-amat nga maagom ang paghiliusa sa pamensaron base sa MLKMZ.

Indi alalangay ang lebel sang mga katapu sang Partido; may abanse, may nahanunga, kag may

nagaka-ulihi. Dapat husto nga pakigbagayan sang mga kaupod nga abanse ang mga kaupod nga nagaka-ulihi, amiguhon sila, magpakighiliusa sa ila, kumbinsihon sila kag buyukon sila nga mag-abanse. Kon wala ginabuligan nga mag-uswag ang mga kaupod nga nagaka-ulihi, mangin buhaghag ang Partido indi lamang sa ideolohiya kundi bisan sa organisasyon, kag mahamulag kita sa masa.

Dapat husto nga pakigbagayan ang mga kaupod nga nagsayup, kag palig-unon ang rebolusyonaryo nga paghiliusa. Isa ini ka malahalón nga talaksan kon dala sang isa ka Komunista ang proletaryo nga kasangkaron sang pamensaron. Kon ginapangibabaw ang personal nga away, kon nagahupot sang hibubun-ot sa mga kaupod nga nagsayup, kon ginahamulag sila kag ginapakalain, maguba ang paghiliusa, mahalitan ang rebolusyon, kag magaluya ang Partido.

Sa pagpangapin sa paghiliusa sang Partido kag paghiliusa sang Partido sa pumuluyo, dapat mag-umpisa ang kada Komunista sa ispiritu sang Partido nga konsentrado nga ginapahayag sang masunod nga bilin ni Mao: isapraktika ang Marxismo, indi rebisyunismo; magpakighiliusa, indi magpangtungga; mangin bukas kag tampad, indi magpang-intriga kag magkunsabo. Dapat muklat nga sakdagon ang linya kag mga polisiya sang Partido kag hugot nga tuhayon ang duha ka tipo sang banggianay: ang banggianay sa tungga sang pumuluyo kag kaaway, kag ang banggianay sa kubay sang pumuluyo.

Ang pagpakigbanggi sa kasaypanan sang mga kaupod sa kabilugan banggianay sa kubay sang pumuluyo kag kinahanglan nga lubaron paagi sa

pagkumbinsi, paggamit sang rason, pagpataas sang lebel sang kamuklatan kag pagbilog sang determinasyon nga magtadlong.

Kinahanglan ini nga tuhayon sa sandigan sa pagpakigbanggi sa pila lang ka oportunistang traidor nga wala nagakilala sang kasaypanan, nagapangindi nga magtadlong kag bangud sini nagakadto sa pagpangtungang pagsikway sa MLKMZ kag sa Partido kag pagtraidor sa rebolusyon kag sa masa. Tuman ka gamay sang numero sang oportunistang traidor kag kinahanglan nga lubos sila nga ihayag kag awayon.

Sa mga kaupod nga nagamuhan, natiplang sang mga rebisyunista kag oportunistang traidor kag nagsayup, makikaupod naton nga iathag ang ila nga nagligad nga kahuyangan kag kasaypanan kadungan sang pasyensyoso nga pagbulig nga athagon ang ila pagpamensar kag tadlungon ang mga kasaypanan.

Bug-os katampad naton nga isapraktika ang polisiya nga "magtuon sa mga nagligad nga kasaypanan agud likawan ang mga ini sa palaabuton". Madalum naton nga analisahon ang mga kahuyangan kag kasaypanan, tumuron ang ugat kag sirkumstansya sang sini nga mga kahuyangan kag kasaypanan agud malikawan ang mga ini sa palaabuton. Kaangot sa mga kaupod nga nagsayup ukon may kahuyangan, hugot naton nga ipatuman ang pagsulundan nga "bulngon ang sakit kag luwason ang pasyente". Ang katuyuan sang pagsaway amo nga "bulngon ang sakit", buot silingon, buligan sila nga mahangpan ang kahuyangan kag kasaypanan kag magtadlong.

Sa pagpalig-on sa paghiliusa kag pag-away sa isplit, kinahanglan nga mangin mabinantayon kag handa permi ang pamensaron kag balatyagon sa mga oportunistang kag mga traidor nga nagadabok sang pagpanggamo kag pagpangtungang. Kinahanglan seryoso nga magbasa kag magtuon, kag ipatuman ang tatlo ka bilin ni Kaupod Mao: "isapraktikang ang Marxismo, indi rebisyunismo; magpakighiliusa, indi magpangtungang; mangin bukas kag tampad, indi magpang-intriga kag magkunsabong."

**D. ANG KOMUNISTA DAPAT
TAMPAD SA PAGSAWAY-SA-
KAUGALINGON KAG AKTIBO SA
PAGPAKIGBANGGI SA
IDEOLOHIYA PARA
PAMATUKAN ANG MGA SALA
NGA TENDENSYA KAG PADAYON
NGA PAUSWAGON ANG
PAGTRABAHO KAG ESTILO
SANG PAGTRABAHO.**

1. Ano ang proletaryong nga panindugan sa pagsaway kag pagsaway-sa-kaugalingon?

Ang proletaryong nga panindugan sa pagsaway kag pagsaway-sa-kaugalingon amo ang bug-os

katampad nga pagsaway-sa-kaugalingon nga mga kasaypanan kag sa kasaypanan sang mga kaupod agud mapaayo ang pagtrabaho kag estilo sang pagtrabaho kag matukod ang paghiliusa kag kusog sang Partido kag masa, kag isulong ang interes sang masa kag rebolusyon.

Kinaandan ang mga kakulangan kag kon kaisa bisan ang kasaypanan sa aton nga paghulag bunga sang mga kahuyangan sa pag-analisa, limitasyon sa kinaalam kag inagihan, sala nga pamensaron, ugali ukon pagginawi kag iban pa nga kabangdanan. Ang mga kakulangan kag kasaypanan nagasablag sa pagsulong sang hilikuton kag makahalalit sa interes sang pumuluyo, gani ang Partido kag Komunista kinahanglan permi nga mangin mabinantayon kag handa nga magtadlong.

Agud mangin tampad sa pagsaway-sa-kaugalingon, kinahanglan nga mangin tampad sa pagkilala sa kaugalingon kag sa pag-analisa sa kaugalingon. Sa sini nga pamaagi lamang maathag nga makita ang kaugalingon nga kahuyangan kag kakulangan. Subong man, kinahanglan nga waay sang pagpang-alang-alang nga batunon ang mga kasaypanan kag kahuyangan, sin-o man ang nagasaway. Ang tampad nga pagsaway-sa-kaugalingon kag paghangup sa mga saway sang mga kaupod kag ang pagpanadlong sa mga kahuyangan kag kasaypanan tuman ka malahalon sa pagremolde--sa pagsikway sa mga indi proletaryo nga ideya kag pamensaron, pagginawi kag estilo sang pagtrabaho.

Ang indi pagsaway sa kaugalingon nga mga kahinaan kag kasaypanan makahalalit sa

rebolusyon. Indi man ini makabulig sa kaugalingon bangud yara kag wala madula ang mga kahuyangan kag kasaypanan bisan tabunan. Sa ulihi nga bahin labi lamang nga magalala ang mga ini.

May mga tion nga ang makita lamang naton amo ang aton nga mga kabaskugon kag indi ang mga kahuyangan. May mga tion nga makita matuod ang kaugalingon nga mga kahuyangan pero nahadlok nga mahuy-an. Pareho nga manipestasyon ini sang pagka-makinaugalingon kag nagapakita sang kawawad-on sang kritikal nga aktitud sa kaugalingon.

Sa pagsaway, kinahanglan likawan nga mangin mahuluy-on kag sobra ka mahalong bangud nagakahulugan ini sang paglikaw sa banggianay pang-ideolohiya kag pagbuhi sa rebolusyonaryo nga prinsipyo. Bisan man, ang pagkamakahas sa pagsaway kag pagsaway-sa-kaugalingon indi nagakahulugan sang pagka-suhetibo kag pagpadasu-daso. Kinahanglan nga magpanayasat kag hibal-on ang kamatuoran halin sa datos. Dapat patuhawon ang kamatuoran, mangin rasonable kag matarung, kag magpursige sa pagkumbinsi paagi sa rason.

Ang pagsaway dapat nakasentro sa pulitika kag nagaigo sa mga halambalanon sang prinsipyo. Kinahanglan nga likawan ang pagka-arbitraryo kag suhetibo. Permi nga magpokus sa mga mayor nga halambalanon sang husto kag sala sa ideolohiya, pulitika, kag organisasyon kag indi sa mga menor nga punto. Ang mga personal nga kahuyangan, maluwas kon kaangot sa mga kasaypanan sa pulitika kag organisasyon, indi kinahanglanon

nga sawayon sang sobra kag maglab-ot sa pagpakahuya sa kaupod.

Ang pagsentro sang pagtamod sa mga mayor nga halambalanon ang solo nga pamaagi agud mahakos naton ang prinsipal nga kontradiksiyon sa mga bagay kag maanalisa kon ano ang esensya sang palaligban. Kon magtum-ok sa mga punto nga sekundaryo kag menor kag indi maghimo sang kongkreto nga pag-analisa, maga-usik ang mga kaupod kag masa sa gagmay nga halambalanon. Indi ini makabulig sa pagpataas sang lebel sang kamuklatan kundi magabunga lamang sang pagkamahuluy-on kag sobra nga paghalong kag pagkalipat sa mga rebolusyonaryo nga katungdanan.

Kinahanglan nga napanahon man ang pagsaway. Indi paghulaton nga matipon kag magpatinambak kag magdaku ang gagmay nga kasaypanan antes tun-an kag sawayon ang mga ini. Regular nga ilunsar ang pagsaway kag pagsaway-sa-kaugalingon agud mangin labi nga mapagros ang kabuhi pang-organisasyon. Gani, ang Partido mangin matuod nga abanse nga taliba sang proletaryado nga puno sang kapagsik kag kabuhi.

2. Ngaa tuman kamalahalon sang aktibo nga pagpakigbanggi sa ideolohiya? Ano ang liberalismo kag ang kalainan nga ginadulot sini sa Partido kag rebolusyon? Paano pamatukan ini?

Tuman kamalahalon sang aktibo nga pagpakigbanggi sa ideolohiya bangud sa sini lamang nga makapursige sa MLKMZ kag sa husto nga linya kag polisiya kag masikway ang mga indi-proletaryo nga pamensaron kag paggginawi, makapursige sa husto kag masikway ang sala.

Sa pihak nga bahin, ang liberalismo ukon paglikaw sa aktibo nga banggianay pang-ideolohiya kag paghandum sang paghiliusa nga waay sang prinsipyo naga-uk-ok sa MLKMZ, nagabunga sang paglihis sa husto nga linya kag polisiya, kag naga-engganyo sa impluwensya nga burges kag pyudal sa sulod sang Partido kag rebolusyon. Nagatulod ini sa pag-isol kag pagkagaruk. Ini tuktok nga nagaguba sa salsalon nga paghiliusa kag determinasyon sang Partido.

Subong man, liberalismo man ang sobra nga pagpakigbanggi kaangot sang mga bagay nga indi malahalón kag ang pagpakigbanggi nga wala sa panahon. Sobra nga pagsunod man ini sa kaugalingon nga kagustuhan, bagay nga makaguluba sa paghiliusa.

Liberalismo man ang pagsaway sa guwa sang husto nga pulong, ang pagpangguba kag pang-intriga. Kinahanglan himuon sa husto nga pulong ang pagsaway kag pagbanggianay--sa mga pulong kag konsultasyon kag indi sa tsismis kag paglibak.

Pareho sang tuktok, ang mga kahuyangan kag kasaypanan kinahanglan nga kutkuton sa kaidadalman; pareho sa malain nga hilamon, mapamatukan lamang ang liberalismo paagi sa

paggabot sa mga ugat sini.

Ang liberalismo nakaugat sa pagka-makinaugalingon kag indibidwalismo nga petiburges. Para lubos nga mapamatukan ini, kinahanglan nga kakason ang pagka-makinaugalingon kag sakdagon ang interes sang rebolusyon, pursigihon ang mapagsik nga banggianay pang-ideolohiya, pataason ang proletaryo nga kamuklatan kag papagsikon ang kolektibo nga pagpamuno, pagpangabuhi kag pagtrabaho.

3. Ano ang suhetibismo? Ano ang kalainan nga ginadulot sini sa Partido kag rebolusyon? Paano mapamatukan ini?

Suhetibismo ang panan-awan sa mga bagay nga bangian, manabaw, indi nakabase sa kongkreto nga kamatuoran kundi sa sala nga haum-haum. Suhetibismo ang pagbilog sang kongklusyon bisan nga kulang sa pagpanayasad. Suhetibismo ang sala nga pag-analisa kag sala nga pagbilog sang kongklusyon.

Ang suhetibismo, kakulangan sa pagpanayasad kag sala nga pag-analisa nagabunga sang sala nga polisiya kag desisyon, sang oportunisto sa pulitika kag komandismo ukon ikogismo sa organisasyon. Nagahalit ini sa interes sang pumuluyo, nagapahuyang sa Partido, nagadulot sang pagkahamulag sang Partido sa masa, kag nagapauntat sa pag-uswag kon indi man nagapaatras sa rebolusyon.

Maugat ang suhetibismo sa indi siyentipiko kag indi proletaryo nga panan-awan kag pamaagi sang pagpamensar. Para pamatukan ini, kinahanglan nga armasang sang mga Komunista ang kaugalingon sang siyentipiko nga panan-awan kag pamaagi sang MLKMZ kag kakason ang burges kag petiburges nga panan-awan kag pamaagi sang pagpamensar. Sa tanan nga halambalanon kag hilikuton, kinahanglan nga ipalapnag kag sakdagon ang ispiritu sang kongkreto nga pag-analisa sa kongkreto nga kahimtangan kag ang paghibalo sang kamatuoran halin sa mga datos. Kinahanglan nga analisisahon kag lantawon ang mga halambalanon sa lain-lain kag pinakamadamo nga anggulo sa baylo nga sa isa lamang.

Kinahanglan nga pauswagon ang paghangup sang mga katapu sang Partido sa materyalismo nga diyalektiko kag istoriko kag sa paggamit sini sa pag-analisa kag paghangup sa mga kongkreto nga halambalanon. Kinahanglan nga ipalapnag kag pauswagon ang pangkatilingban nga pagpanayasat sa lain-lain nga lebel kag sakup bilang basehan sa pagtalana sang mga taktika sa paghimakas kag mga pamaagi sang pagtrabaho.

4. Ano ang indibidwalismo? Ano nga kalainan ang ginadulot sini sa Partido kag rebolusyon? Paano pamatukan ang indibidwalismo kag lain-lain nga dagway sini?

Indibidwalismo ang sobra nga pakamalahalon

ang kaugalingon nga interes samtang ginapaidalom diri ukon ginabale-wala ang interes sang organisasyon kag sang rebolusyon. Indibidwalismo man ang pagpapangibabaw sang interes sang gamay nga hubon sa interes sang kabilugan.

Makita ang indibidwalismo sa mentalidad sang "gamay nga hubon", mansig-mansig nga "ginharian", pamensaron nga empleyado, paghandom sang personal nga kalipayan, pagbalos sa nakabanggi, pagpangluya sa hilikuton kon may palaligban ukon nakaagi sang kapaslawan, sobra nga demokrasya kag pamensaron nga lubos nga pagka-alalangay. Kon analisahon, ang tanan nga ini pagpangibabaw sang interes sang kaugalingon ukon kaugalingon nga gamay nga hubon sa interes sang kabilugan.

Ang mga ini repleksyon sang pamensaron nga burges kag petiburges. Kabanggi ang mga ini sa interes sang proletaryado kag pumuluyo kag sa ispiritu sang pag-alagad sa pumuluyo.

Ang ultra-demokrasya ukon sobra nga demokrasya isa ka manipestasyon sang indibidwalismo. Ini ang pagduso sang "independensya" sang ginasudlan nga yunit sang Partido sa relasyon sini sa sentro sang pamunuan sang Partido kag iban pa nga organisasyon sang Partido; ang pagduso sang sobra nga desentralisasyon; ang kakulangan sa pagkonsultahanay kag paghatag sang regular kag napanahon nga pahayag; kag ang pagpakagamay sa iban pa nga organisasyon sang Partido.

Manipestasyon man sang sobra nga demokrasya

ang pagkonsiderar sa kaugalingon nga kagustuhan lamang kag indi sa nagahiliusa nga determinasyon sang Partido. Subong man ang pagbangigay kag pagbais sa gagmay nga bagay kag indi sa mga halambalanon sang prinsipyo.

Makatalagam ang ultra-demokrasya bangud ginauk-ok sini ang paghiliusa sang Partido, ginapaluya ang determinasyon sang Partido, ginapanubo ang ikasarang sini nga mag-away, kag mahimo nga magresulta sa pagpaksyon kag pagpangtungang. Ginapunggan sini ang hugot nga pagpatuman sa linya kag polisiya sang Partido.

Ang pamensaron nga lubos nga pagka-alalangay isa pa ka manipestasyon sang indibidwalismo. Ini ang pagpangindi nga kilalahon ang magkatuhay nga kahimtangan, ikasarang kag kinahanglanon sang lain-lain nga indibidwal kag yunit sa sulod sang organisasyon sang Partido. Ginaduso sini ang pagka-alalangay sang tanan sa tanan nga tion--sa pagtalana sang hilikuton, sa disposisyon sang mga kaupod kag sa pagtalana sang mga resorsa.

Indi ini nagasanto sa kongkreto nga kahimtangan, ikasarang kag kinahanglanon kag nagasablag sa pagbilog sang paghiliusa kag pagtuman sang hilikuton. Ini pamensaron kag buluhaton nga petiburges nga halin sa ekonomiya nga artesano kag gamay nga mangunguma. Bisan pa sa gulpi nga paglantaw pagka-alalangay ang ginahandum, ang motibo nga ara sa likod amo ang makinaugalingon nga kabalaka nga basi malabawan sang iban. Tubtub nga indi madula ang kapitalismo kag lubos nga malutos ang burgesya,

ilusyon lamang sang mga mangunguma kag gagmay nga propyetaryo ang pamensaron sang lubos nga pagka-alalangay.

Dapat alalangay mas o menos ang pagtalana sang katungdanan kag pagpanagtag sang materyal nga resorsa sa hangaway sang banwa kag Partido, pareho sang alalangay nga alawans sang mga katapu sang Partido, kag upisyal kag soldado sang hangaway sang banwa bangud rekisito ini sang subong nga paghimakas, apang kinahanglan nga pamtukan ang indi matarung nga pamensaron nga sobra nga pagka-alalangay bangud indi lamang nga indi ini rekisito sang paghimakas, tigaylo sa pagkamatuod nagasablag pa.

Kinahanglan nga lubos nga pamtukan sang Komunista ang indibiwalismo kag tanan nga dagway sini paagi sa:

- * pagpamatuk sa pagkamakinaugalingon kag mentalidad sang gamay nga hubon kag pagsakdag sa ispiritu sang pag-alagad sa pumuluyo;
- * pag-armas sang MLKMZ sa aton pamensaron;
- * pagpalig-on sang pagkabalaka sa organisasyon kag disiplina kag pagpamatok sa ano man nga pagbale-wala sa pang-organisasyon nga disiplina;

- * pagsaprapraktika sang kongkreto nga pag-analisa sa kongkreto nga kahimtangan kag pagpamatuk sa suhetibismo;
- * pagpangibabaw sa proletaryo nga pulitika kag pagpangabuhi sa demokratiko sentralismo;
- * pagpabakud kag pagpalig-on sang pagpamuno sang Partido, sistemang komite kag mapagros nga relasyon sa tunga sang mas mataas kag manubo nga organo kag sa tunga sang mga organisasyon sang Partido;
- * tayuyon nga hugot nga angot sa masa;
- * pagsaway kag pagsaway-sa-kaugalingon; kag,
- * dugang pa nga pagtinguha sa pagremolde sang kaugalingon.

**E. ANG KOMUNISTA
INTERNASYUNALISTA,
NAGAHIMAKAS PARA SA
PAGHILWAY INDI LAMANG**

**SANG PROLETARYADO KAG
PUMULUYO SANG KAUGALINGON
NGA PUNGSOD KUNDI BISAN
SANG PROLETARYADO KAG
PUMULUYO SANG BILOG NGA
KALIBUTAN**

**1. Ngaa internasyunalista ang
Komunista?**

Agud magdaog ang proletaryo nga rebolusyon, kinahanglan nga agawon sang sahi nga mamumugon ang gahum pangpulitika. Buot silingon, kinahanglan nga magtindog bilang nagapamuno nga sahi sa pungsod ang mamumugon. Apang indi sa makitid nga pungsudnon nga katuyuan nga kabanggi kag malain sa interes sang iban nga pungsod, kundi sa katuyuan nga tapuson ang tanan nga pungsudnon nga pagpamigos, tapuson ang tanan nga away sang mga pungsod kag bilugon ang pagka-ululutod sang tanan nga mamumugon kag anak-balhas sang tanan nga pungsod. Sa sini lamang padayon nga mapasulong ang proletaryo nga rebolusyon tubtub sa lubos nga magdaog sa bilog nga kalibutan. Ang ultimo nga katuyuan kag lubos nga paghilway sang proletaryado, ang lubos nga pagdula sang pagpanghimulos sang tawo sa tawo, ang pagdula sa mga sahi kag pagtukod sang komunismo matabo lamang sa lebel sang bilog nga kalibutan, sa paghilway sang bilog nga katawhan.

Ang sahi nga mamumugon waay sang pungsod.

Ang nagapangibabaw nga interes sang sahi nga mamumugon amo nga isulong ang rebolusyon pangkatilingban kag lubos nga hilwayon ang mamumugon kag iban pa nga anak-balhas sa pagpanghimulos kag pagpamigos sang burgesya sa bilog nga kalibutan. Ilabi na sa panahon sang imperyalismo, maathag nga ang paghari, kusog, operasyon kag angtanay sang burgesya indi lamang sa mansig nila nga pungsod kundi sa lain-lain nga pungsod kag sa bilog nga kalibutan. Agud epektibo nga maaway kag lutuson ini, kinahanglan ang pinakamalapad nga rebolusyonaryo nga paghiliusa kag pagbinuligay sang mga mamumugon kag pigos nga pumuluyo sa bilog nga kalibutan.

Internasyunalista ang sahi nga mamumugon kag ang ara sa ubod sang proletaryo nga internasyunalismo sini amo ang paghiliusa kag pagsakdag sa interes sang proletaryado kag masa nga anak-balhas sa bilog nga kalibutan.

Sa panahon sang imperyalismo, ang mga paghimakas para sa pungsudnon nga paghilway sa mga kolonya kag malakolonya indi maihamulag nga bahin sang pangkalibutanon nga proletaryo nga rebolusyon. Ang mga kolonya kag malakolonya bahin sang pangkalibutanon nga sistema nga kapitalista kag masalapan ang pinakamasingki nga pagpanghimulos kag pagpamigos sang monopolyong kapital kag mga lokal nga papet sini sa masa nga mamumugon, mangunguma kag petiburgesya sa syudad. Ang pagdaog sang rebolusyon sa mga kolonya kag malakolonya nagapahuyang sa imperyalismo kag nagapasingki sang kontradiksyon sa kubay sang mga

imperyalista, nagatuga sang dugang nga paglala sang krisis sini sa kaugalingon nga mga pungsod, kag nagatuga sang tuman ka paborable nga kondisyon sa pagsulong sa rebolusyonaryo nga paghimakas sang proletaryado sa mga kapitalistang pungsod.

Gani, indi lamang hugot nga kaugyon sang proletaryado ang tanan nga mga ginahimuslan kag pigos nga pumuluyo sang kalibutan agud mahilway ang sahi, kundi ang paghimakas para sa pungsudnon nga paghilway ara na sa pagpamuno sang proletaryado kag waay na sa pagpamuno sang burgesya.

Ang demokratiko nga rebolusyon sang banwa sa Pilipinas kabahin sang proletaryo nga pangkalibutanon nga rebolusyon. Ginasulong ini sa pagpamuno sang Partido indi lamang para hilwayon ang mamumugon kag pumuluyo nga Pilipino sa paghari sang imperyalismo kag mga lokal nga papet sini, kundi agud maka-amot man sang malabot sang masarangan sa pagsulong sang paghimakas sang proletaryado kag pumuluyo sang kalibutan batok sa imperyalismo kag para sa sosyalismo. Sosyalista nga rebolusyon man ang ikaduha nga hut-ong sang rebolusyong Pilipino.

Kag samtang ginabuyok ang pinakamalapad nga suporta sang mamumugon kag pumuluyo sang bilog nga kalibutan sa rebolusyon nga Pilipino, muklat ang Partido nga magsalig pangunahon sa kaugalingon nga paghimakas kag sa suporta sang masang Pilipino. Kinahanglan ini agud maseguro ang malig-on kag tayuyon nga pagsulong base sa kaugalingon nga ikasarang kag pagtinguha.

2. Ano ang panan-awan sang Komunista sa nasyunalismo?

Ang nasyunalismo ginasadag sang pungsudnon nga burgesya sa katuyuan nga ipakig-away ang ila nga pagpangibabaw sa pungsod kag kontrolon ang pungsudnon nga balaligyaan. Sa esensya ang nasyunalismo nga burges kasugpon lamang sang pag-amlig sa kaugalingon nga kapital, negosyo kag ginansya. Ang nasyunalismo nga burges sa mga pungsod nga biktima sang pagpamigos sang mas daku kag mas gamhanan nga pungsod mahimo nga mangin positibo kag rebolusyonaryo. Apang sa pagtratar sa iban nga pungsod nga mas gamay kag mas mahuyang, ang nasyunalismo nga burges waay sang pagpangduha-duha nga nagatulod sang kaugalingon nga diskriminasyon kag pagpamigos.

Ang sahi nga mamumugon sa mga kolonya kag malakolonya nagapartisipar kag nagapanguna sa paghimakas para sa pungsudnon nga paghilway, pareho sang pagpasakup kag pagpanguna sini sa paghimakas para sa demokrasya batuk sa pyudalismo kag pasismo. Subong man, ginahimo ini indi agud magsadag sang kaugalingon nga nasyunalismo, nga sa pagkamatuod pagsadag sang pagpakighimbon sang proletaryado kag burgesya ukon indi gani paghari sang burgesya sa pungsod. Ang katuyuan sa baylo amo nga hawanan ang banas sa pagsulong sang proletaryo nga rebolusyon nga sosyalista sa kaugalingon nga pungsod kag maka-amot sa malab-ot sang masarangan sa pagpasulong sang rebolusyon nga proletaryo kag paghimakas

nga anti-imperyalista sa bilog nga kalibutan.

May basehan nga paghiliusa ang pagpamuno sang proletaryado sa patriyotiko nga paghimakas batok sa imperyalismo para sa pungsudnon nga paghilway, kag ang internasyunalista nga katungdanan sang proletaryado sa mga kolonya kag malakolonya, bangud ang kadalag-an sang mga patriyotiko nga paghimakas nga ini magapaluya sa imperyalismo, sa pangkalibutanon nga sistema nga kapitalista kag makapasulong sa kawsa sang proletaryado.

3. Paano kongkreto nga masakdag sang Komunista nga Pilipino ang ispiritu sang proletaryo nga internasyunalismo?

Kongkreto nga masakdag sang Komunista nga Pilipino ang ispiritu sang proletaryo nga internasyunalismo sa madamo nga pamaagi.

Sandigan diri ang pagsikway sa makitid nga pungsudnon nga panan-awan, kag pagsakdag sa interes sang proletaryado kag pumuluyo sang bilog nga kalibutan.

Sa tanan nga tion, ginapangibabaw sang Komunista nga Pilipino ang panindugan para sa paghiliusa sang tanan nga ginahimuslan sa baylo sang makitid nga panindugan nga pungsudnon. Ginapangibabaw niya ang pagkabalaka sa malig-on nga pagsulong sang rebolusyon para alagaran indi lamang ang kaugalingon nga pungsod kundi ang pumuluyo sang bilog nga kalibutan kag masakdag,

sa sini, ang dungganon nga kawsa sang komunismo.

Ginasakdag ini sang Komunista nga Pilipino sa pagpursige sa pangunahon nga nagasalig-sa-kaugalingon nga armadong rebolusyon tubtub sa kadalag-an. Ginakilala niya ini bilang pinakadaku nga amot nga mahimo ihatag sa pangkalibutanon nga paghimakas nga anti-imperyalista kag proletaryo nga rebolusyon nga sosyalista.

Husto nga nagatuon ang Komunista nga Pilipino sa sitwasyon sang kalibutan. Ginatun-an kag ginahangup niya ang padayon nga nagalala nga krisis sang pangkalibutanon nga kapitalismo kag nagalubha nga kahimtangan sang proletaryado kag pumuluyo, ang mga kadalag-an, sablag kag palaligban sang pangkalibutanon nga kahublagan nga proletaryo, kag ang padayon nga nagasulong nga paghimakas sang proletaryo kag pumuluyo sang kalibutan.

Nagapakig-isa kag hugot nga nagapakigbuligay ang Partido sa iban pa nga Marxista-Leninista nga partido, organisasyon kag kahublagan sa iban nga pungsod base sa MLKMZ kag linya batuk sa moderno nga rebisyonismo. Sa lain-lain nga pamaagi nga masarangan, ginapalapnag sang Partido ang MLKMZ sa proletaryado kag pumuluyo sang iban nga pungsod.

Nagapakig-isa kag hugot nga nagapakigbuligay ang Partido sa mga pumuluyo, kahublagan sa pungsudnon nga paghilway kag mga pungsod nga nagahimakas sa imperyalismo kag reaksyon. Ginabuyagyag kag gina-away sang Partido ang tanan nga padihot sang imperyalismo

para dugang pa nga himuslan kag piguson ang iban nga pungsod.

Nagapakig-isa kag nagapakigbuligay ang Partido sa mga sosyalistang pungsod kag sa ila nga pumuluyo para pangapinan kag isulong ang pangkalibutanon nga kahublagan nga sosyalista.

Ginapahangup sang mga Komunista nga Pilipino sa pumuluyo nga mangin sablag sa tayuyon nga pag-uswag sang katilingban nga Pilipino ang pagpabilin sang imperyalismo; nga kon magdaog ang rebolusyong Pilipino kinahanglan nga dugangan ang bulig sa paghimakas sang proletaryado kag pumuluyo sa iban nga pungsod tubtub lubos nga mapukan ang imperyalismo kag tanan nga reaksyon.

MGA TALAMDAN:

1. Mao Zedong, **LIMA KA BULAWANON NGA SILAK:**
 - a) *Alagaran ang Pumuluyo*
 - b) *Ang Buang-buang nga Tigulang nga Nagtapan sang Bukid*
 - k) *Sa Handumanan ni Norman Bethune*
 - d) *Pamatukan ang Liberalismo*
 - e) *Nahanungod sa Pagtadlong sa mga Sala nga Ideya sa Sulod sang Partido*

2. Karl Marx kag Frederick Engels, Seksyon II sang **MANIPESTO SANG PARTIDO KOMUNISTA**, "*Ang mga Proletaryo kag mga Komunista*"

3. Mga pinili nga Pasidungog sa mga martir sang

rebolusyon nga Pilipino